

愧

瘖

集

愧瘖集卷之十九

莆田二山野

序

贈學憲顧頤齋七袞序

頤齋公弱冠時輅也年適均同藝習事之若兄
公學姿穎詣作文章超邁儕輩輅也私矩規之
事之殆長者然公登鄉薦輅惕乎其後旣相次
第進士公令建昌吉水二劇邑輅備臬巡得而
觀焉廡也戢奸恪也杜黷勤也警慢平氣以靜

鬻優衷以舍垢廣惠以植弱篤信以俟遇則喜
公之養凝也可爲吾師矣公復令青陽補驗封
主事遷文選主事素位怡情於海內士品知名
隱美心識弗遺以銓除齟齬長僚改南以稽勲
郎中僉蜀憲督學政正學端範因文翼秀時出
品衡匪局翰墨人曰願齋公精勤古鮮其比暨
憲副于浚復督學政教浚猶蜀也其功于作人
哉戊戌公蒙調翩然歸今且二十年矣予先公
歸四年酸辛之味偃蹇之性負荷之業公弗後

于子泉后癖諸烟霞痼諸耕釣迂諸子於公則
辱數數教焉今相視皤然長翁也感懷今昔夢
寐間爾公於稀壽抑偶然哉輅於壬午歲見程
初亭御史昌監試江右檄公外簾錄文多出公
手程語藩臬曰顧建昌深於學粹雅典則可式
諸人海內遠觀名士也又嘗聞少司馬山齋公
曰毛東塘大理爲予語顧志仁聞其勤學人也
不知其政事之能若是在吉水數月爾而人
有百年之思東塘優於才也志仁之政可知矣

青陽起復補吏部外官起復補吏部者自公始
太宰桂見山迎謂之曰子知今日所以相處乎
吾自筮仕時卽聞道譽今喜得子矣故進退人
才商諮義道公每與焉蜀派諸達賢歲時候公
信息棟梁榱桷皆適其用公之澤流矣故壽也
者壽民也壽國也壽諸徒也公匪仁者與叔代
紛糾塵務委纏公於人不堪其處者若浮雲若
敝蓰若蚊虻然而泰宇寧只顏面穆只動容周
旋儀以穀只公耄期可待也其弗百齡已乎人

曰公壯齡遺榮未究夫用其志世與經有之曰
天壽平格保又有殷公抑少此耶輅乃言曰士
大夫以官爲家老于官去猶繫鬱懣毀防多矣
公粹望頌人其固異哉公事坦齋驗封公孝事
宜人柳旦夕順志易感憤爲底豫友恭兄弟姊
妹罔弗裕悅禔諸身得於天者厚矣二十年里
居部檄再至再辭焉公自信曰投老何遲白首
結廬先傍青山又曰忍貧已慣讀書之外不復
知軒冕我榮矣此公實歷語也輅也知公故爲

誦之昔者文潞公復平章軍國年已九十矣
寵喜錢宣靖急滾勇退砥柱纓紳力更倍焉奚
弗寵悲二公進退各逢其時尚夫志可也潔其
身弘夫道可也立其大乎諸後可也願齋尚友
古人其亦自信哉公之壻朱某洪某陳某暨予
子敦履議爲公壽問言於予乃述此爲贈有擇
言耶

贈逸菴戴翁九表序

二山子於丙辰冬闋世年且稀適復兒遷官南

巖過家以誕節待客族鄙舊故姻戚罔弗集乃
集鄉前輩若顧翁文冕九袞又六姚翁體敬八
袞又八宋翁西村八袞又五暨諸翁到者相次
多八袞凡二十餘賓巾服古朴談論敦訥獻酬
湛適謔然遲遲然皆上壽徵也二山子喜語
所知曰我奚知鄉老成人若茲盛乎又奚知壽
者文物多茲爾雅乎予弗集諸翁并見也時維
新里居逸菴戴翁以郭外遠道辭予告叔氏亦
稼穀盛曰戴翁弗至予咎也邇者翁之孫科朝

賓子之妹夫以戶部主政督餉輸邊竣事過黃
爲翁壽翁子別駕竹居廷璋君价子叔氏以壽
章子委予乃颺言曰天之應弗誣善感者忱福
之徵若類氣淑者協翁之壽匪人所及也翁弱
冠卽辛勤自植課耕而耦力課圃而分畦約而
度能贏于匱兢而積可達諸施逮壯遊鄰邑百
里遠近之間與處者相給有無相需伸縮商之
誼弘人咸喜之甥王筆峰大叅與別駕幼日翁
延師教之廣志昭業筆峰文行勳庸吾鄙所鮮

別駕錄賢書教孝豐令長沙雲陽倅鎮江皆不
負其官公之澤遠矣嘉靖乙巳歲大祲鄉多餓
孳翁散粟給粥日有紀慮無以嗣稱貸濟之俟
熟乃止鄉扁旌宣義禮之飲賓翁辭之隱然鄉
有通丈人也朝賓鄉選南宮選子皆賀翁見翁
赫奕而輿循于堂階號呼僕御問其墅其疇其
畜其餽歷歷唯答乃止又間聞翁曰賓至酒食
無違否候伺無慢否歡樂無渝否神若凝淵聲
若震玉氣若旋鼎壽其可量哉予問翁曰東池

翁居也華壺朔南靈秀融液瑞芝生也翁其茹
之與蘭川晝夜清沃元始瑞菊生也翁其飲之
與翁曰茹芝者仙飲菊者仙古之人能之叟非
能也微福于天偶儕巨老子若孫慰予老處則
素位仕則竭忠清時有人物評寒宗有嗣肖錄
叟勤而望諸予再拜曰翁壽得天庇論者謂不
數數謂閩寡有謂吾鄉獨美談也予壽章紀實
焉巴爾

贈叔氏愧松翁七十壽言

愧松翁者與先中丞招翁從昆弟也長某一齡
弱冠後先游儒庠探討墳籍承樹家學志則同
也予撫楚歸翁已謝舉子業數禩矣林莽相娛
歲序相將宴享相酬誼道相告安否相視更二
十餘春秋嘉靖丙辰翁躋七十懸弧之日則仲
夏十有六日群從昆弟年踰耄則南園翁踰稀
則東臬翁春渠翁偕諸弟姪踰稀及耆艾壯者
四十有奇拜翁壽康之宅屬某文之某也拜手
稽首言曰俞嘻休哉我五世祖壽九府君啓址

鳥山下后塘道譽誼聲鄉無長少皆敬慕之林
數世替弱府君遺孤爾詎冀裕胤存今耶我遜
軒公白簡清霜爲直御史文二公樂道嗜學爲
名逸士教授贈御史勿齋公崇正廸道爲賢師
儒侍御他石公不避時觸忌自任臺紀今奕葉
矣世澤賢科繹如有紹文章詩禮庶稱道源輅
也衰白留念宗祊惕乎其若警也翁勿齋公之
孫他石公震器公在日與諸耆舊逸老會翁祇
將意指奔走已席間汗汪然弗拭眸炯然弗遷

步踰然弗跛諸耆舊喜其勤而止其履曰可少
避諸翁弗爲避先世丘墓視護惟勤竊宰木者
則痛苦瘝身悟而自譴則謝之稽展掃輒弗寧
語夫承者曰雨露之濡風霜之肅孝子慈孫其
容違處乎蘋藻將之殺羞薦之儼乎若祖之有
在也其視諸翁撫幼弟體石公之念鄉人稱之
晚生諸子每焚香自矢曰吾逾耆矣人言老而
子多倍愛也則家塾教之端其幼志浸使知學
皆翁之淑乎暮齡也眇能視微能聽齒能腊决

手足舞蹈動容周旋無壯歲異人皆歆之其斯
以爲難矣夫壽善之徵也福之會也世之澤也
族之瑞也翁之壽吾有三言焉曰世祖作之其
泐穆之候乎曰友于規之其質忠之孚乎曰操
勵效之其湛虛之感乎若耄若耄若期其有弗
致乎矧我子姓仕者曰毋負蓋良學者曰毋廢
精造農者曰毋失恪純抑且相安相保相規相
勸以綿世德於百世則翁之壽之教尤吾家諸
叔父昆翁子姪友恭敦敘之素心也廼相與執

爵爲壽

賀南京少宗伯康礪峰公初壽序

君子之年莫於未躋躋則兢兢自視人於君子之年亦莫其躋躋則爲喜爲誦禮以章之樂以融之岡陵以禱之情則然矣昔者洛中耆英之會文富二公德業大老餘數公相次曰老而凍水司馬公侍從居洛年獨后也以二公懇致亦與會焉然亦年六十矣古學道槩昭代英也初壽靈長渾元注也二公欽崇其至矣乎無亦莫

司馬公他日砥柱臣棟勳于國家列祖哉司馬
公起相中興元祐之治更法復古器使錄賢握
乾坤扶日月爲時名相天下賴之於洛中諸公
仰冀其副矣乎公上師聖賢寅謙邁志終日乾
乾經綸豫業故於初壽益兢於無濟允蹈耶吾
鄉少宗伯礪峰康公今歲丁巳亦初壽爾鄉諸
縉紳於公罔弗侈談曰礪峰初壽海邦其瞻又
曰君子道長出處維光輅也箕于礪峰猶涑水
也乃拜而言曰

今皇帝御極嘉靖雍熙寤寐得人常若弗及乙
未歲廷試天下士親閱群言錄直諫礪峰在選
中與海內同進數公皆爲庶吉士讀中秘書彬
彬然鸞鷲鳳凰翱翔天陛人皆謂公殊遇也公
爲編脩爲講讀所養敦厚論議究極暨三校藝
及門之士文若武多得人暨爲院長爾雅朴忠
時譽籍然爲少宗伯寅清矩規成憲罔渝二十
年受 上知列大僚與數公師師弘業公非豪
傑與吾鄉官翰苑如林綱齋林澹軒柯竹巖陳

愧齋吳靜觀黃壺陰林方齋六公皆入望也或
晚遇弗待或壯遇若蹶未有作相時亦過矣否
泰剝復天道則然時命邁會今昔殊也吾冀礪
峰其鍾山川之靈抱元輔之器臻期耆之年者
乎於今初壽卜之公其學凍水端明乎宋儒呂
東萊曰大臣之位百責所萃震撼擊撞欲其鎮
定辛甘燥濕欲其調劑槃錯焚結欲其解紓黯
闇污濁欲其茹納予亦僭言曰匪渺聲利大道
奚彰匪齊毀譽讜言奚至匪恪機防辜釁奚息

匪念側陋遺逸奚揚固相天下事也司馬元祐
之治所以自許有餘衷焉吾集公亦曰學司馬
公也公將北上奏績見

聖天子必以舊德壽俊留公公之圖報抑淺淺
耶經曰天壽平格保乂有殷礪峰之壽壽國與
民壽天下也壽古人也其獨壽夫身爲寵已耶
鄉縉紳語予曰叟之壽言贈也有規道焉予復
之曰叟長公十齡矣林壑直激其深言乎友道
也公其誦之言有合哉

贈朱默齋擢融邑教諭序

朱君默齋分教吾菴凡六禩矣邇者銓曹廉賢
簡融邑教諭夫菴稱文獻濟濟多士師固樂於
教也融近全永士習變化浸納王彝朱君握教
而師之非士之幸歟古之師所寄重矣擁羶抗
顏言則誼道衷非渝也達旨尚志趨則豪傑儔
非黨也削員滌垢用則瑚璉體非虛也皆師責
也士者恂恂抑抑省而獨發而隱其遇也則將
以其廣於師者措諸行昌猷贊化國家靈長允

必賴之若朱君者非吾黨之所謂善教者乎君
恒誦孟子曰人有不爲而後可以有爲又曰必
行一不義殺一不辜而得天下者不爲乃可謂
之不爲斬然自信門戶恪嚴其所得非淺也故
其教荀也貧者艇脯私藏不入微者禮之無澤
于色文優者錄行優者獎歲歛有司賑士不逮
者捐祿贍之學政私釁亦齟齬君於例約矩條
守益嚴不問毀若譽喜若怒巧若拙直道而行
率翼于正人皆是君而侈于談雖當路始弗憚

亦竟是其執而譽焉先是莆教諭武陽王子易
箕視襖縞衣三日日訊其家人有餘思焉暨其
襯歸易祿以贖君蓋義於友獨士者師哉莆諸
士嘗曰默齋吾師少受其父雙硯公之教稍長
侍其伯父茶園宦遊壯學益勤今淑然師儒表
夫有所受之與謂君非東粵之豪哉融山水邦
也自肇慶西徂旬日可底靈區奧域隱見周遭
籍籍稱司吏隱昔柳子厚謫柳數暮文藻賦詠
烟霞卉木借以爲光吏治其餘也懷州傳自得

知興化軍謫融杜門讀書既而得徙自便迺復其官則融之視莆又奚間乎開寶間曰單光佃者融產也博學能文荐臻清秩今莆掌教李子四峰亦融產也科名奕世善慶流光文獻徵者蓋多矣君志古友今其有負于用哉君子之學小用則小徵大用則大徵余於君三致勤焉子歸二紀余接郡邑諸文學若君乃余所畏君別固宜以言適菑士蔡子胤秀鄭子倫表弟林子效恭舍弟大化輩以言徵乃復之且慰薛泮贈

私云

贈祖姑夫后洪方翁偕祖姑氏雙壽序

后洪祖姑夫方公隱而延年丁巳孟秋吉誕期
八袞矣吾祖姑氏配德齊眉長公四禩秋仲亦
壽期鄉人稱之曰二老異哉鍾氣淑爾其敦也
席休滋爾其臻也囿化淵爾其秩也鄉指數能
幾耶族人稱之曰二老異哉而胤恭勤無支廢
也而澤源瀦無闕過也而養適冲無匱羸也族
指數能幾耶林子大輅戚屬晚生也再拜言曰

公少失怙恃艱貞苦節志行自植爲我輩名稱
貧竒抱獨抑而直則鬱罔而懇則違古心雄辯
無憚貴豪無卑賤困傳經探牘奧旨躍然談今
古而精之其要之會于原不失作者意予有疑
輒質于公公爲解疑諸門人出公塾類有顯者
罔弗念公也數竒弗售謝學籍肥遁自怡來學
者則教之時維中身矣重本始脩歷代祖墳小
宗祠宇日惟以有功弗嗣二祖叔爲念恐恐然
憂廢食爲子姪語輒涕下辛丑壬寅公年餘耆

族人平其始建廟學烈祖著作郎墓公欲詣墓
所覓舊址是夜祖姑夢著作冠服速公往山且
往墓已平而新墳突如也官覈首證得舊址復
之罪毀墳者罪者捏保詞異漏辜網祖姑復夢
著作怒甚呵遣二役殺袖保詞者明發袖保詞
者自山谷來文峰路一跌而息弗續官細驗之
事果白嗚呼異哉后淇公尊祖敬宗能竭夫力
列祖愛而依之孺人殫意致神寤寐如見烈祖
喜而語之二老之事其迺竒哉鄉若族前聞之

後應而協焉謂祖孫一氣非與謂孝敬一心非與二老之善之慶其弗百齡耶若語夫奇雖百齡未艾也予楚歸二十餘載鄉之老稱壽錄所長似也而耦壽者鮮耦壽間有之如后淇公如吾祖姑氏可述而傳者尤鮮后淇其有道丈人哉我

皇祖御極推恩凡庶民八十以上賜冠服

列聖相承誕申恩命姻族輩勸公祇承公不敢受曰重不肖老而作也予謂公學足作人孝足

格先剛風勁氣足爲後生小子聞見今日之恩
固一清朝敬老意也公謂逾侈耶公之子力學
有聞諸孫玉立蘭茁有發其祥其紹世德裕後
人易易爾大輅於是乎滌研執筆振衣獻吉爲
公雙壽賀鄉人誦之族之人誦之名宗文獻於
是乎徵

贈致仕司訓壺南定卿先生七十壽序

二山子大輅嘉靖甲午歲撫楚瞭災乞罷歸與
定卿先生論世於先哲敦誼於舊朋滌垢於規

議堅履於執存定卿語予曰子其知匱菴哉知
匱滋聞知菴勵植吾與子共圖之蓋竊議志也
暨聞予逸叟願梅尊翁翁喜進小子語之曰子
與乾鎮共勉之今歲丁巳定卿年躋古稀予亦
愧能稀俯仰今昔若旦暮爾而姪梧子秉哲拜
予請曰我翁壺南誕節後公二閱月公同心之
言冀教予不肖予領焉嘗記願翁於甲午歲七
十有一齡矣翁同翠庭中丞林翁臨淵副憲吳
翁他石柱史寒谷副憲二林翁友泉潮尹宋翁

少司馬山齋鄭翁爲逸老會鄉國名勝高陟雲
躐平凌渤澥幽而僊踪奧而靈宇皆選勝談真
撫化遺塵意有合哉而誼道典刑耆英風槩習
俗見聞渾厚敦雅其庇章矣時召予侍几杖樽
俎之間翼翼于于弗能惰困退而再拜言曰諸
老之壽非天所畀孰能造之願翁高士白璧元
精疇其似之君子哉今者去甲午二十餘載矣
壺南又壽而人之期之懌之揚之其固公是哉
壺南赫冠堅志勤學器可遠到提身觀物浮盈

益兢孝友敦睦天性則然數屈於進恥操嚴於
有終予私畏焉壬寅貢于太學翁年七十有九
壺南以遠遊違養孰與重輕矢弗徃翁數數道
之乃以養志行旣分敘潮陽未數月移俸爲公
養翁非乏之養也陟嶠望雲百心曷慰風而感者
多矣諸當道亦注意獎賢至于已酉敘範士心
益泮而戴東粵得師可追昔人壺南懇辭歸養
諸當道留之辭且悃壺南復陳情卽日割俸不
待報徑歸門下士留之不能止時論益賢之人

間萊彩南海儒紳大道復崇宦業有章林子爲
壺南誦曰世澤繩矣令聞可旣耶道氣符矣神
監可遷耶湖山儲矣吾黨可証耶吾知乎壺南
壺南奚愧夫君子孝也者道原也善萃也壽也
者人瑞也天精也壺南其弗百齡已乎先是南
裔寇賊焚蕩屠戮于連江航頭青山寨之疆二
子欲觴祝長齡壺南曰憂心奚舒敢忘時難城
守囂然入夜登視爲民望也予褰衣隨行若弗
建暨寇舟泛海我兵數千追之弗果寇乃遠睽

壺南稱喜曰吾老矣其異遇乎吾其覬泰階可
延乎二子復請言予從賓客後宗盟爾友誼爾
世樞爾予敢有隱乎壺南其謂予擇言乎予嘗
竊比願晦翁逸老會諸逸老皆能言也其亦謂
予擇言乎願質諸壺南叟

贈李四峰令雲和序

四峰李子西粵融望也領丙午鄉書再蹶南宮
以母老就高要教諭母憂起復補莆田教諭乃
擢雲和令吾鄉諸子過予言曰四峰先生文行

師也高要之教人皆仰之莆教復聿然矯警弗
屑媮逸與楚文衡多得人行將爲循吏公豫注
者贈言其公徵哉林子瞿然對曰今者牧于民
也殆父母煦其子然令之煦民信如父母於其
子斯亦賢矣廣愛也朝夕被焉弘業也心跡符
焉令之賢弗重與去古益遠風教浸漓鬻譽取
容志則貶矣復有踈朗瓌異如路饒陽者乎章
賄府辜脩則蠱矣復有恪直廉清如沈丹徒者
乎徇時溺習紀則隳矣復有克已勵俗如竇臨

水者乎令之難民之禍釁其可舒乎予知李子
再歲矣言斤斤乎辯也習得乎凝也事鑿鑿
乎飭也若夫貶志蠱脩隳紀其殆免矣夫雲和
善令林子於是乎箕之矧忠孝舊學積美奕世
自先公方伯而下若郡若邑若庶職樹之聲稱
播之風望留之錄紀果融望也其異於人也哉
李子必於雲和衍世德於宦名哉潮東西濱海
盜賊虔劉民井里生聚盡于屠毒爲之令者禦
侮蹈險誠難矣雲和僻遠奧區也吾鄉高君四

溟簡易仁愛善世率物守處州政平訟理七邑
之民戴之無寧紹嘉湖時報羽檄比也屬之靜
愿宜民孚名實於上下雲和其優裕哉李子嘗
言曰政教異乎哉吾師二庠士也邁往令催科
徵調追呼鞭苔吾憂其困也又曰議論涉歷異
乎哉吾見理人者謂得行其志今身履之羸瘠
凋瘵吾懼其深也嗚呼李子心乎民矣其謙也
自憂由衷之愛誰能禦之莫任也自懼鞠窮之
瘁誰能分之經云罔曰民寡惟慎厥事罔曰弗

竟惟旣厥心李子有之崇階大政抑節強齡固
他日庸伐也其有艾耶吾固書以俟之獨雲和
贈言與

郡大夫李君新溪 欽獎序

欽獎殊遇也有道者弗自信謂疎迹愧爾質言
非揚也稽徃者弗渝衷謂過情罪爾闔郡耆老
告予曰新溪公父母我民旣三月矣今者受獎
于 天子吾儕竟徵焉忻躍感誦有餘賜哉道
叟迂戇爲我文之予唯唯乙卯冬倭寇逾青山

寨由南渚林往涵江渠魁坐屋規便獵人以藥
弩斃之乃去海口居之久海口廣地聚氓屠戮
日滋百物千艘浮海而逝丁巳冬復至涵江放
火燔積糜爛千餘家三澳傷矣戊午倭復由三
江攻福清陷城空邑攻莆陽城疑竝衝乃賄麻
陽客兵以鳥鏡斃攻者寇南往三年復寇天未
厭禍民孰與生郡邑長民者寇至則禦之寇退
則曰退也時則然也是冬新溪公拜吾興郡丞
郡人喜曰我民得父母乎旣蒞郡則撫院檄攝

憲安已未三月增埤濬河敵樓危峙才斗紆聲
成蹙肅戢寇謀阻乃去嗣攝同安暑雨淡月城
無完堞寇臨城同安且危公發帑募丁壯樹柵
捍之東衣督戰分必死寇退嗚呼功多哉壯大
夫也十月公還郡闔郡候公歡聲榮如公慰之
十一月倭聚食福清逕上數千不歸至是南行
每于楓亭公語茗寮將以麻陽兵夜襲之寇卒
卒無以禦曳席奔盜囊枕藉馬牛數百兵盡有
之兵弗追寇驅被擄者若干人奪貨強盜詐級

所殺不可紀公語叅將寇奔矣兵勞也第賞之
遂備呈軍門夜急步數發隔日軍門乃勒兵歸
以防釁害其慮深矣公於刑罰輕催科漸嘗曰
備塚守壩民則尸之空廬離折饑色痿膚予孰
與民又曰里俗脆怯撻十貸者倍一金復撻復
蕩也貧輸稅能耶嘗報急閉城鄉號泣數千人
乞援公弗閉任其出入盤詰弗滯公體仁濟滿
有是哉泉安之功

欽獎有彝天鑒在茲

綸綽章章臣子名實公弗自信耶矧軍門薦賢
臺省錄才海防民紀聿踐厥勳奚負明試耶公
昔昔長寧善政之大有三成都楊太史升菴序
且諄守上恩復王土五十五村廣文教以變夷
惠安李抑齋憲副序之予知公深矣振鷺之詩
曰在彼無惡在此無射庶幾夙夜以永終譽新
溪公志也予日望之采菽詩曰樂只君子天子
命之樂只君子福祿申之耆老懷德弗忘哉予
撫楚公適賓興予疏歸二十七禩今公拜我于

西源之廬詩之下武曰受天之祐四方來賀予
祝公也亦知人言有合哉嗚呼新溪公其明時
豪傑也夫

蓬窓林翁七十壽言

二山子某氏曰予嘗觀古人之籍論人所以得
壽者其徵多矣旣耳目睹聞槩而徵可類列炳
炳然乎者夫太和之世元氣淪浹凡民樂利克
以永年太和之人壽也山澤之居嗜慾鮮少凡
民靜愿弗斷其生山澤之人壽也論世者廣論

居者覈其義亦大矣僊谿蓬窓林翁世賢予族
祖也去城市而居深山遠囂隘而甘闕寂益四
世于茲矣正德嘉靖四十年間郡邑多良

皇仁弗壅翁談農課圃喜豐懼歉輸賦稅力征
徭無逾分事敦義秉直然諾必酬鄉之人敬之
永春德化鄰邑相交遊者亦曰蓬窓其僊谿者
舊與莆鄉黨也莆之親若族過從者亦罔弗曰
吾見今人若慙于古如蓬窓之善于老顧弗難
哉歲辛亥翁享年七十矣鄉之人與鄰邑咸有

贈慶述翁之美曰翁可以言老矣屬予作壽言
先中丞招唐翁暨予父辱翁愛宜有言也翁幼
失父事母黃氏以孝聞持家約殖產弗能競處
群從兄弟憂其弱力翼而助之俾無墜前聞其
子漳能甘旨怡暮節人皆稱曰翁善人其食報
哉吾林自邵州後譜牒相續昭穆奕世在僊遊
者數支可稱者數丈人自植也亦吾家世德之
衍也翁之伯兄行九翁年且八十矣老不識官
府辨菽麥謹牧放訥訥嚮嚮如也鄉之人亦稱

曰九官其林氏後也蓬窓事之甚恭庶幾司馬
氏遺教抑林素風固然耶可以觀翁之大矣翁
間歲至城郭至則相會會則談里閭故實賦畝
辛瘁灑然可聽嘗聞官保素翁揚于族庶曰毋
謂山居陋也如世賢姪雖城之傑其謙恪奚以
同之盛時育保故能有立吾於世賢欲族卑幼
式之嗚呼素翁深於睦族也於是高子信卿族
叔居清嘆曰二山子斯言抑亦睦族意也請書
之爲公壽

政譽賀言

夫君子之學在立志也志以統之在利用也用
以章之先實後名重內輕外其古之人自奮者
乎昔者班孟堅作漢史於循吏傳多所表見其
綜述陳緝采采弗襲純瑕具竟雖見聞或踈記
憶若舊班典制於是乎勤矣後之人沿班亦已
久矣蓋近民之任莫郡國若我朝

聖世列辟益重斯選三載考績黜陟幽明每歲
巡察臺省時其賢能而薦之而君子之學任者

固重也譽弗喜自考曰人之情不相遠也毀弗
怨則自艾者細曰奚有於是焉知人難哉或知
未廸疑易隙時事人情其固可懼哉吾郡公祖
陳雲澗公以才進士賢正郎蒞吾興甫數月吏
懾民懷燁有政聞樊御史巡按廉而獎之夫聖
賢以得民爲難而獲上必於遲久公何以蚤有
譽於上下哉以厥庶民旣厥臣達大家以厥臣
達王惟邦君公其君子之學哉公純孝體仁愷
惻明慎自守興來迂太安人爲養旦夕甘髓必

冠裳侍立身敬端矣其求民莫推心置人腹事
無大小日再詳畫之思拂公是士類匪辜百心
開原氓或訟弗順弗友則哀其愚召立庭下反
覆曉諭令之自新偷兒賭少稍給之貲俾悔過
記責治生業夫學施有政罔不丕式嘉樂令德
宜民宜人鄭之遺愛齊之仁人漢之循良如召
父杜母輩光昭史帙有餘耀焉嬰之豈第樂只
以帥先之焉耳矣興數年寇盜濱海民聚連毗
蹂躪焚廬屠黨村落黯淒旣顛覆溝壑奔淪險

蠶生死集于榛土者實繁誰則知之勦捕諸役
視盜若戲災歲荐饑民扶老弱避寇入城椹藉
市壤日斃于疫報者相次莫如之何皆公履任
務也公也弭盜之術固本急焉曰制客兵曰嚴
禁戢曰發倉放糶曰勸分緩征公心乎民澤遠
矣人之言曰客兵懼矣今者轄遣西歸粵北歸
齊吳又曰歛能衆濟餒者生矣今稻穫夏疇民
餘粒食乎公仁政鑿鑿美談所學弗旣大耶仙
邑令文侯屬余贈言撫實章之匪澤也昔司馬

公范文正公其自任者天下事所學者古之人
雲澗公志也用也錫類之孝也景前脩憂
明主母曰二公其獨諸

記

翠竹山房記

泰和西鄉尖星名秀蓋墾山也東行十里勢復
層會閩臬副石竹劉公居焉人稱曰劉岡劉先
御史慎獨公倚岡結屋讀書題曰翠竹山房山
性宜竹翠竹者異乎其植也古里居弗張枿而

完其茲謂山房與房俯谿谿之源混混東派于
江曰龍湫活水遶房而流崖而瀑而賁曰雲壑
飛泉再曲而東逾于橋曰鐵橋橫渡谿曰石高
數尺屹滾而障曰玉關深鎖山言方曰兌山街
斗石如覆釜然水言位曰良水卧牛二石如牛
當下流偃曰石亭竹色曰里社松陰亭納諸勝
社歲釀以穆噫亦奇矣蜿蜒數里許煙霞風雨
之變寒暑朝夕之候龍蛇之蟄見禽魚之飛沫
茲罔茲谿其備觀矣乎山而茹美水而烹鮮摘

甲而蔬飫甘而稼老壯少穉不出于其鄉作息
游詠惟黨之適山若谿其功于劉哉夫君子之
居必世其族於佳山水必靈承無負世之高臺
華屋鐘鳴鼎食以勝堪輿之勝蓋多見之而澤
流弗光其胤也微而範也渝彝乃偕之釁徃徃
未數傳而易主而傾棟而榛墟亦可畏哉劉之
盛慎獨公基之茲齋公郎中嗣之石竹又嗣而
大之植之忠貞煥之文章淬之辛勤博之惠利
式之著蔡後之人嗣者未艾也劉岡之望奚直

鄉已耶人之言曰有聞人則有聞山

纓池記

王子世琛南金居甲子山凡三世矣而屋櫺如
而纓星如而席恭如蓋鉅族也王子於桑梓恭
於子姓睦於幹止寧所居之東有纓池王子樂
之其分教吾菑稱於人曰纓池王南金人稱之
必曰王纓池云纓池者俗相傳唐李靖行兵經
此馬奔落纓乃濯之於池人因名焉或曰滄浪
之水清者濯纓言纓者美之也環池皆田也環

田皆山也芙蓉東來承之馬鞍蜿蜒出泉自東
壩注之池沿南壩過東垌逾翠筠翁處士之墳
西之山若雞籠黃鸞約諸水至西垌石關口與
纓池會達亮門塘入于蒼谿闔亮門二流廻伏
纓池瀦焉白波滯疇山之影可掬亮門關蒼谿
水洪則上流四五里距于纓池魚鳶飛泳蒼煙
秀水相映蔽堪輿家謂之名勝非與夫纓池王
氏專之直名于鄉耳然深源緝流盈科後進善
學者譬之虛而受滿而施納污而澄善量者譬

之沃壤導和弘元氣以碩黍稷滋百物善澤者
譬之夫學而後能量量而後能澤王子之教也
冲襟約度喜士好文人多憚焉移而教于青浦
因耕而端其習讓夷而示之誼志欲行業欲貴
師欲道纓池直於鄉重耶子聞吉州長興天目
茗谿聞天下予之友棟塘陳子忠夫南茗韋子
希尹居相近也清脩粹養今之稱豪傑者歸之
予之言荒奚是以記纓池王子歸更質諸陳子
韋子言

後峰黃先生龍臣

後峰先生輦於

武皇帝朝疏六事奪職家食凡二年巡察御史
沈君灼令有司作書院於蒙山浮屠之西禮先
生談古學以淑鄉之後進

今皇帝嗣極起先生爲大理寺丞未幾卒

上悼贈之官恤其家復諭祭焉歲壬子巡察御
史聶君豹以書院祀先生春秋二享有司治之
申辰章侯檄由御史謫理吾郡嚮往先生梓其

遺文若弗及者暨視邑篆拜先生于祠進其子
耕孺言曰祭有田古也先生之祠可無田乎乃
市平民某人田若干畝乃括古囊雲濤亭茶菓
田若干畝上其議于分巡僉事利君賓利謂崇
賢也贊而行之遂以其田歸耕孺耕焉夫先生
之所樹立天下以爲宗祀之禮也亦義起也歲
久者稽齋遠者玩勢則然矣侯於先生殆永所
祀哉初侯之議斯田也某與聞焉問之曰市田
無難與侯曰官之費猶槁壤而潦約而市義於

賢者謀矣復問之曰僧之田無誕與侯曰隱畝
質賄錙徒者繁惟祀之馨君子是將匪予之歎
也諸大夫同志也於乎世之爲郡縣者簿書期
會凡法令所及則汲汲然趨之至於郡有先哲
政有化樞率視爲迂談曲事甚者講張而辜其
胤世降習靡抑何惑焉侯知其大者其關係弗
旣多耶耜孺以記屬予予謝不敏再歲侯遷維
揚郡丞邑令劉子宦告予曰後降祀田公其誌
之伐石樹碑宦役焉君子曰衆美備矣於先生

可以論世矣於章侯可以知政矣於劉子可以觀志矣某於是識而詳焉若夫田之所之畝之幾則書于碑之後

龍坡書室記

古城西天華山一舍許衍壤也塵者吟者齋黃始祖璠值五季之亂率鄉人作城爲禦因名曰義城黃氏云祖宋進士侯山炳則卜廬東精舍迄于今族食指繁舍之東則鳳山龍坡侯城院者居浮屠氏黃子子聚嘗藏脩游息于茲子聚

爲予言曰奎於龍坡雲笥之石几之嘉樹巢之
草茹之鳥翔獸集撫而群之曰桂川曰芸莊東
覲之曰顧渚曰平湖曰文筆西若南覲之曰雙
虹曰亭衢北覲之曰天馬曰梓峰又南覲之奎
於龍坡終其身而識焉者也予遊西江久子聚
伯氏義城先生以御史直道謫蓮塘丞予數會
于螺川招往精舍予偶未暇也鄉貢士平湖叔
氏子文亦言精舍之勝予心慕之子聚友在諸
生來見予謂義城曰族之鉅風節文章其來者

蒼矣義城起落貴陽學憲復忤時歸予自楚還
予歆懷賢思舊慨衰感時精舍雖遠惟寤忘之
旣子聚以南宮乙選來教吾莆則翼然凝視檢
徒之疆植力藝萃而觀之願而稽其進煦之餘
祿乏者惠種學織文欲追古作者之域予固知
子聚之得於龍坡而龍坡藉子聚增若光者可
竟耶或曰宋文信國忠元虞伯生文嘗讀書侯
城黃其進於是夫子答之曰忠也大如世何文
則名如用何夫熙穆爲貞士之遭也經綸日孚

學之朴也夫黃子者山川之鍾祖德之慶伯仲
之觀大矣哉子聚以典文衡別予予爲記龍坡
書室且質諸義城其謂予言然否

愧松記

愧松者何友人黃大卿君別號也君世居涵江
負竒氣屈山之野餘十里許種樹而林其土之
喬然絕者飄天香曰桂嶺突然出者薦時翠曰
蘿岑窈然淵而澄者爲池池有魚隊泳遠而巍
然相視則壺公古囊諸峰朝夕陰晴南北異狀

會心豁抱於是備矣中衍而平構屋數椽積古
今書百千卷日讀其間庭有松三株磔砢蒼鬱
若端人正士若節夫貞叟君賓焉而樂其似寓
曰松徑旣而客京華四五載日懷屈山謂無松
稱也因更號曰愧松間以語予予爲君記之靜
與躁異虛與固異觸之外而感之中情則然也
君與予遊論時事俯首不答論身事茫茫然若
失其言曰檢身不篤沉癖日增古調不可復沿
習滯故淪溺久矣立諸獨其如遠之不揚竟乎

俗其如理之未同蓋昔者見聞識悟莫之省焉
則愧夫松真愧焉已爾夫歲寒先凋改柯易葉
松愧非松也君之愧松似也君自省切於身心
其取物不在夫形迹則烏有於松之愧哉君自
京師官長沙買舟泝河濟歷呂梁諸山弔彭城
諸古蹟又歷彭蠡瀟湘泛洞庭雲夢慨屈子忠
誠悲宋玉搖落惜賈生之才藻見益廣聞益富
反樸歸真形神以完疆植致遠冲粹弗眩自得
之學用世之抱於松也增美廬山之勝其不孤

矣予他時得故山遊懷若松而過焉大卿不予
棄道而前尚當爲君解松愧昔陶靖節於菊蒼
終身焉人曰菊遇矣大卿慕陶者也能不愧于
松謂松之遇非耶吾固記之而冀松遇

愧瘖集十九卷終